

ZAKON

O IZMJENI I DOPUNAMA ZAKONA O POSTUPKU ZAKLJUČIVANJA I IZVRŠAVANJA MEĐUNARODNIH UGOVORA

Član 1.

U Zakonu o postupku zaključivanja i izvršavanja međunarodnih ugovora ("Službeni glasnik BiH", broj 29/00) član 19. mijenja se i glasi:

"Član 19.

Na pregovaranje i zaključivanje međunarodnih ugovora kojima Bosna i Hercegovina preuzima kreditne i druge finansijske obaveze (u daljnjem tekstu: kreditni ugovori) primjenjuju se odredbe Zakona o zaduživanju, dugu i garancijama Bosne i Hercegovine ("Službeni glasnik BiH", br. 52/05 i 103/09) i odredbe ovog zakona."

Član 2.

Iza člana 19. dodaje se poglavlje VI A i čl. 19a., 19b., 19c., 19d., 19e. i 19f. koji glase:

"VI A - POSTUPAK RATIFIKACIJE KREDITNIH UGOVORA

Član 19a.

Izuzetno od odredbi čl. od 13. do 17. ovog zakona, na postupak ratifikacije kreditnih ugovora primjenjuju se odredbe ovog poglavlja.

Član 19b.

Postupak ratifikacije međunarodnih ugovora primjenjuje se prilikom zaključivanja međunarodnih ugovora kojima BiH preuzima kreditne i druge finansijske obaveze - kreditne aranžmane.

Član 19c.

1. Delegacija BiH u roku od pet dana od dana potpisivanja međunarodnog ugovora - kreditnog aranžmana dostavlja Ministarstvu vanjskih poslova Bosne i Hercegovine tekst originala potpisanog međunarodnog ugovora - kreditnog aranžmana.
2. Ministarstvo vanjskih poslova Bosne i Hercegovine, bez odgađanja, a najduže u roku od sedam dana od dana prijema teksta međunarodnog ugovora, dostavlja Predsjedništvu Bosne i Hercegovine prijedlog odluke o ratifikaciji međunarodnog ugovora - kreditnog aranžmana.

Član 19d.

1. Predsjedništvo Bosne i Hercegovine, radi dobivanja saglasnosti za ratifikaciju, dostavlja Parlamentarnoj skupštini Bosne i Hercegovine prijedlog odluke o ratifikaciji međunarodnog ugovora - kreditnog aranžmana, bez odgađanja, a najduže u roku od sedam dana od dana prijema.
2. Parlamentarna skupština Bosne i Hercegovine odlučuje o davanju saglasnosti za ratifikaciju međunarodnog ugovora - kreditnog aranžmana u roku od 15 dana od dana dostavljanja prijedloga odluke o ratifikaciji od Predsjedništva Bosne i Hercegovine.

Član 19e.

Predsjedništvo Bosne i Hercegovine, po dobivenoj saglasnosti Parlamentarne skupštine Bosne i Hercegovine, odlučuje o ratifikaciji međunarodnog ugovora - kreditnog aranžmana, bez odgađanja, a najduže u roku od sedam dana od dana dobijene saglasnosti.

Član 19f.

Sve nadležne institucije iz čl. 19b. do 19e. ovog zakona dužne su zakazati hitne sjednice radi postupanja po hitnom postupku ratifikacije međunarodnih ugovora - kreditnih aranžmana u rokovima utvrđenim ovim zakonom."

Član 3.

Ovaj zakon stupa na snagu osmog dana od dana objavljivanja u "Službenom glasniku BiH".